

## GENESIS ABRIDGEMENT \* AGARABI

### Tiyaarapenu mínoh yánaáh úwáremíh.

1:1-25 Éetéh araáíhen Tiyaarapenu inaarú wára tíantan apokáh emíh. Warárah manaa yánaáh íhyaa waamíh. Tiyaarapenu amán ano nón yaroh pá mántemíh. Mínohpímpáh tíhtíhpaa úkaamíh. Tiyaarapenu tíhtíhpaa yaímen temíh. "Kúh kaanóo," tíkan káa kemíh. Káa kan kámáa ín Tiyaarapenu oháren temíh. "Waayaníh emíh." Tíhtíhpaamá eín ín úrane temíh. Máih yamúh éetéh yamutíh emíh.

Tiyaarapenu tíantemíh. Nómpíntéh kóonanámáh áyónámáh e ántáren óhíwin ménáhpáh mínán apokáane temíh. Máih yamutíh emíh.

Tiyaarapenu nón tíantan nón, káákán nón, mámin wára éhawemíh. Tiyaarapenu yáa, káhtá yánaáh, tíantan áraa aará apokáh emíh. Mínohaa áyuníh in kókoníh úkemíh. Máih yamutíh emíh.

Tiyaarapenu ááhau, wiyón, ópu tíantan

Yenetiti I

apokáh emíh. Waayan ááhau úríntene tíren ááhau  
kaaemíh. Inúran wiyón ópu úríntene tíren wiyón  
ópu kaaemíh. Mihantúran wáraráh kaa kiyaamíh.  
Mái yánaátán ááh keín yamúh ááh yeín yamúh  
aníhoónowan kaaemíh. Manaa yamúh manaa  
órená aníhoónowan kaaemíh.

Tiyaarapenu nónáápíma waaín káyo  
tíantan áraa aará apokáh emíh. Mihantúran  
areraáh kaáuh yáran kókoníh úkemíh.  
Tiyaarapenu ahmaréma noín káyo tíantan áraa aará  
apokáh emíh. Mihantúran areraáh kaáuh yáran  
kókoníh úkemíh.

Tiyaarapenu wáraráhma waaín, wárpíma  
waaín yánúh, úráran tíantan apokáh emíh. Áraa  
aará apokáh emíh. Tiyaarapenumá apokáh eín  
mínoh areraáh kaáuh yan káyoíh úkemíh.

Tiyaarapenu tápo, yáá arán, yunáane  
tíren kaaemíh. Wáántá úráran, nún nantene tíren  
kaaemíh.

Tiyaarapenu wáántá úwáremíh.

1:26-2:25 Tiyaarapenu wáántá úwáremíh.  
Wáántáuh anaatiuh úwáremíh. Wé awúh  
awaahkáh úwáremíh.

## Chapter 2

Tiyaarapenu wárápóhkéh wáántá ano úwáremíh. Wáántá átíh aimpín púhtiren áyún amemíh. Máí wáántá awih Ááhtaane temíh. Tiyaarapenu káakan yunáán yóh yen Ááhtaan awiren me yunáámpín múh yemíh. Éhten wáraráh nón arupáh yunáán waáremíh. Máipín áraa aará yáá, kámáá yáá, waamíh. Auhwáánaahkáh yáá manaa waamíh. Wáántá ano máí yáá aramá nein íhyaa purínteintemíh. Auhwáánaahkáh éena yáá waamíh. Wáántá ano máí yáá aramá nein kámáá awúh awaah námú awúh awaah íninteintemíh. Tiyaarapenu Ááhtaan tían amemíh. "Yunáántátáh yapítewáh waanóo. Auhwáánaahkáh yáá waamíh. Wáántá ano máí yáá aramá nein kámáá awúh awaah námú awúh awaah íninteintemíh. Máí yáá grán iwáh naanóo. Purínaampo iwáh naanóo. Éena yáá arán nanóno." temíh. Míha tíren wárápóhkéh úwáman úráran ánkáán, nún ánkáán Ááhtaan waaíntáh awiren wé awih kaáemíh.

Tiyaarapenu temíh. "Ááhtaan wéyááhkáh waaín íhyaa kanaaíh emíh. Anaati úwanantah yekén wé awaapun ayaáen wántemíno." temíh. Míha tíren wáántá káakan aun amín

### Yenetiti 3

wáwin áyóran yáhtíren tíkan amati ano entawen yókemíh. Wáántá áyórámpóh anaati úwáremíh. Áahtaan aworákan Tiyaarapenu anaati amemíh. Áahtaan oháren temíh. "Tiyaarapenu tén tiyórámpóh éhin úwáremíh. Tén tiwúh tiwaahkáh úwáremíh. Anaatie teéntehú." temíh. Máiwán wáántá wé anohé apoh éen apaaen wékánán atohtuh úren manaapín waah iyaamíh. Tiyaarapenu Éwaanuh Áahtaanuh tían amemíh. "Tiréhtihaa iyámpón kaáetí mínoh yánaáhkáh yápíte waanóo." temíh. Pára awááhpaq waáken íhyaa áyawé emíh. Tiyaarapenu wéma úwárein yánaáhkáh oháren kanaaíh íkan onemíh. Máí yamutíh emíh. Tiyaarapenu yoran yamúh moo kíhpáren awíkemíh. "Máí yamúh éena yamutíh emíh." míha temíh.

### Chapter 3

#### Wáántá auíh emíh.

3:1-24 Ótapaahé ano káákaníh en kátéreh iyaamíh. Éwaan waaintáh éren temíh. "Ayaarapenu temíh. 'Yáá arán yunáámpíma waáin mínohaa iwáh naanóo.' Puraakú." temíh. Ótapaahé ano míha tíran anaati ano temíh. "Yáá arán katááeh niyaahúno. Auhwáánaahkáhma waáin máí yáá arán neraáuno. Aruéhma eh

puroóntehúno." míha tíran ótapaahé ano temíh.  
 "Íhyaaino. Íhya puríno. Ayaarapenu ínka  
 ínemíh. Náretíma kámáá ápowáh íntemíh.  
 Kámáá awúh awaah, námú awúh awaah ápowah  
 ínóno. Ápowah úre Ayaarapenu mainíh ínóno."  
 temíh. Míha tíkan anaati ano oháran yáá arán  
 araan nákan kúh yen nemíh. Manaahpáhkéh wé  
 awaapun amíkan naren ínemíh. "Tiwááhpaa  
 waarehúno." míha temíh. Yááenáápóhkéh  
 kapínaaíh úren íremíh.

Inuhpatíh ín yunáampín Tiyaarapenu  
 oreráá emíh. Wé áhyátuh arantan awááyáá  
 íníren yáá ohpáh auhmánemíh. Tiyaarapenu áren  
 temíh. "Intéh epónóo." temíh. Wáántá ano  
 temíh. "Arantan awááyáá íníreh tiwááhpama  
 waanawán tikókó páreh auhmantehúno." tíkan  
 Tiyaarapenu temíh. "Awááhpama waaonawán  
 iyéh tí amípóno. Áaréma uántená yáá arán  
 nárepoóno." tíran Ááhtaan temíh. "Anaatimá  
 timeohna, ma nánín ano timih nehú." tíkan  
 anaati ano temíh. "Ótapaahé ano téhin kátérah  
 nehúno." temíh. Tíkan Tiyaarapenu ótapaahén  
 tían amemíh. "Míhamá eona kíyukaayú e óronóo.  
 Téhi tíantekén é akááh mai nánín anon akááh  
 námúroíh úantantemíno. Ayáhkompín árúretín  
 kauríntemíno." temíh. Tíren anaati anon tían

amemih. "Aihpintetah iyampun kaanonoo. E awaapu araan nakein entah yapitintemino." temih. Tiren Aahtaan tian amemih. "Mihan teona wararah namán karáa tiantekén kuwintemih. Anu yoh yewah imahkumpinteh yunaan yore naanoo. Wararahma waah eona mihan tinono. Warapohkeh ehin uwah yakeke eena yah waraih inteono." temih. Miha tiren Tiyaarapenu uraran au anaamunpohkeh uwanantan waamih. Aahtaan anaah awih Ewaane temih. Minoh nanin waantai ayapotih ukemih.

Aahtaanuh Ewaanuh kamaa awuh awaah, namu awuh awaah apowah ukemih. Manaa yaa aran naren ihyaa purinteintemih, mai yaa aran nanaae tiren Tiyaarapenu we ahyatuh tiantan oremih. Yunaan ankinaapah aankero tiantan yapiten waamih. Manaa yaa aran naren ihyaa purinteintemih, mai yaa arantah aankero kayo yapiten waamih. Tohpe, ira anaunama einih ukein tohpe, amaken yapiten waamih. We ahyatuh peeyan yunaan ipaah uren auyen yunaan eenapah mo yoremih.